

摛藻堂四庫全書薈要

集部

欽定四庫全書薈要

集部

誠意伯文集卷三

詳校官助教臣謝登雋



欽定四庫全書會要卷一萬六千五百六十一集部

誠意伯文集卷三

明 劉基 撰

古詩

種懷香

懷香體虛柔本自南土出
毛芒散纖葉旖旎怯朝日
芳菲挺衆卉辛美更無匹
况能已疢癘兼理腸胃疾
種之

近庭階離離看新出驅童斬竹枝扶植待秋實常恐風
雨惡摧折傷弱質疾藜生道傍延蔓何綿密豈無荷鋤
人夕雞旦已出上天意何如感嘆靡終畢松柏多斧斤
山林日蕭瑟

北上感懷

倦鳥思一枝樞馬志千里營營勞生心出入靡定止伊
余朽鈍材嬾拙更無比才疎乏世用嗜僻惟書史雖非
濟時具頗識素餐耻既懷黎民憂妄意古人企寧知乖

圓方舉足輒傷趾塵埃百病侵貧窶萬感累艱難幸息
肩遲莫竊所喜明時登驥馭駕馬但垂耳自非冀北姿
莫羨追風駛便欲解衣冠躬耕向桑梓終懷葵藿戀不
慕沮溺詭潛陽動原隰白日暖蘭芷時雞戒晨鳴客子
駕行李縈紆越巘嶠浩蕩涉風水淹留具區北信宿滄
江汜維時連年歎道路多流徙官司職撫字黔首皆赤
子陳紅太倉米豐年所儲侍為民備乏困朝廷豈私此
推餘補不足茲實王政始臣子宜奉承天威不違咫尺

何簿書曹暴慢蔑至理苟云出納各當閔轂棘死嗚呼
草莽露慘惻溝瀆委聞之猶鼻酸見者宜顙泚踰淮入
大河淒涼更難視黃沙渺茫茫白骨積荒藟哀哉耕食
場盡作狐兔壘太平戢干戈景物未應爾意者斯人徒
縱欲擾天紀鬼神赫震怒咎戾良有以去年人食人不
識弟與姊至今盜賊輦嘯聚如蜂蟻長戈耀白雪健馬
突封豕豈惟橫山澤已敢剽城市途行絕稀少空車但
墻倚身行須結集一窠四五起牧民豈無人司寇亦有

氏陣車不驅馳大田無耒耜邦家祿食恩豈爲臣奉已
山東古要地燕趙猶唇齒况茲南北衝津梁通遠瀕屬
當全盛時四海同一軌廟堂多稷契振舉無遺弛勿云
疥癬微不足成瘡痍滔天起濫觴炎岡發星炬虞朝有
分北漢庭煩直指農夫植嘉穀所務誅狼狽耕耘苟失
時雨露空沾灑威懷豈異任守令職非痺端能慎黜陟
此輩何足弭故鄉隔山川前途塞荆枳青徐氣蕭索河
濟俱泥滓痛哭賈生狂長歎漆室悝何當天門開清問

逮下俚

送布延子壽赴廣西憲幕

離維荆衡南邈迤走蠻徼民風雜徭蠻地勢帶蒙詔迢
迢商周前風水絕織窳後王務廣土懷柔倚攻剽羈縻
非本情疲痾復誰療大明侔日月幽裔靡不照化育之
所加欣榮及蓬藿憲府繩百司選擇自廊廟偏方異習
俗賦性實同調培養自殊途激揚貴知要淒涼溪上瀧
鯢魚困罾釣高風吹霜鶻縹緲集海嶠願言崇令業以

繼南國召

過東昌有感

夜發高唐灣旦及東昌郭喬樹拂踈星霜飛月將落仰
觀天宇清平見原野廓白楊號悲風蔓草杳漠漠但見
荆棘蔽白骨翳寒籟聖道縣日月斯人非虺蜚教養既
迷方欲熾性乃鑿辰季骨已朽清風散藜藿絃歌滅遺
音繭絲盡籠絡鴟嘯魍魎憑螽鳴草蟲躑遂令一變姿
化爲跖與跖况聞太行東水旱荐爲虐飢氓與暴客表

裏相倚着賑卹付羣吏所務惟刻削征討乏良謀乃反
恣剽掠坐令參苓劑翻成毒腸藥今年秋租登行止稍
有託餘波尚披猖未敢開一喙但恐習俗成何由返初
昨藩宣有重寄胡不慎遠略往者諒難追來者猶可作
歌詩附里謠大猷希聖莫

南陵崔氏思梅詩

昔來梅花下綵服輝清尊今來不見人淚滴梅樹根梅
落風不回淚落化爲石冥冥入幽泉一夜千萬尺

晨詣祥符寺

上馬雞始鳴入寺鐘未歇
草際起微風林端斜月僧
房湛幽寂假寐待明發
松徑斷無人經聲在清樾

送鄭希道行省掾滿之泉州錄事

鄭君廊廟姿才識天下冠
若華升朝霞可望不可翫
胸中富文史蔚蔚錦繡段
公餘但好客高論幹雲漢
蓮風散秋幕微露收夕案
吳雲翼行輶閩嶠入竒觀
撫字循深仁剗繁讓明斷
嘉會復何時悠悠仰飛翰

寄題俱世本東溪漁唱亭

落日去層巒清溪澹輕浪嘔啞戢柔櫓歎乃發孤唱初
隨飄風起復逐行雲颺月色照未闌灘聲雜逾壯恐有
濯纓人一聽一惆悵

發安仁驛

鷄鳴發山驛天黑路彌險烟樹出損聲風枝落螢點江
秋氣轉炎嶂濕雲難飲佇立山雨來客愁紛冉冉

發龍游

微颺獻輕涼客子中夜發秋原曠無際馬首掛高月草
虫自宮商葉露光可掇狹徑非我由周行直如髮揚鞭
望南天晴霞絢閩越

早行衢州道中

草際生曙色林端收暝煙露花泣啼臉風葉彈鳴絃農
家喜銍艾行歌向東阡大道無狹邪平原多稻田客行
良不惡敢曰從事賢

鉛山龍泉

茲山近南服勝迹冠朱方石骨入海眼地脉通混茫金
精孕清淑水德融嘉祥寒舍六月冰潤決九里長鯨顛
狎獵起虎口呿呀張發竇既窈窕流渠遂汪洋洞徹瑩
玉鑑鏘鳴合宮商靜含玄機妙動見大智藏養德君子
類膏物農夫望野僧向我言其功殊匪常飲之祛百邪
能使俗慮忘漱嚥入靈府喉舌生清香爽泚動毛髮飄
忽凌風翔何當揚湛冽盡洗貪濁腸

初食檳榔

擯柳紅白文包以青扶留驛吏勸我食可已瘴癘憂初
驚刺生頰漸若戟在喉紛紛花滿眼岑岑暈蒙頭將疑
誤腊毒復想致無由稍稍熱上面輕汗如珠流清涼徹
肺腑粗穢無纖留信知殷王語瞑眩疾乃瘳三復增永
歎書之遺朋儔

望武夷山作

飲馬九曲溪遙望武夷峰長林抱迴合丹崖造空濛浮
暉澹寒翠水木皆曼容薄遊限塵務促景尼竒蹤緬懷

紫陽子千載誰與同瓊佩邈烟霧石函闕遺封羈猿怨
幽澗飛蘿冒芳叢瑤琴空流泉桂枝徒秋風悵望佳期
阻纏綿憂思重殷勤尺素書願寄雲間鴻

發白沙至水口

夜發白沙驛亭午至水口中流鬱風霧密雨蔽原阜冥
濛蛟龍過隱鱗怒雷吼傾歌卧帆席馮翼惑前後畏途
生頃刻顛倒亂足手倉皇投山館喜懼劇紛糾攝身整
衣帶沾濕及肩肘平生歷道路艱險頗曾受未能外形

骸豈敢輕衰朽捐軀匪成仁垂堂不宜狃總轡登前頰
煙雲尚昏黝經阻有妨虞姬文亦奔走

早發建寧至興田驛

鷄鳴戒晨裝上馬見初日露泣葉尚俯霧重山未出客
途得霽景緩步非縱佚矧茲歲有秋高下俱穎粟牛羊
散原野鵝鴨滿阡術懷抱既夷曠神情自清謐寒花蔓
籬落候蟲響蒙密霞標青楓林雪綻烏柏實幽覽雖云
遽佳趣領已悉我行固無期况乃塵事畢

題武夷圖

崇巖奠朱維實維羣山圓葱龍薄光景隱顯變氣候百
泉縈虹蜺萬谷蒸饋鑄深根入無底峻表切星宿增峻
削劍戟窈窕錯錦繡騎雲擘高掌竇石室陰罅金雞鳴
未晨玉女來自逗琪樹縞玄宵瑤花落清晝美人遊不
還霜月怨猿狖淒涼駕壑槎蕪沒白玉樞蓬萊渺滄海
弱水浩浸溜良辰不可掩沉思令人瘦安得凌風翰飄
飄逐飛鷺尋源挹孤清舉林摘三秀逍遙觀物化俛仰

空宇宙真詮倘可求
吾將解吾綬

孔子克相送至鵝湖

憶昨過武夷欲往無與儔
今茲逢故人遂得鵝湖游
輕雲翼征蓋翔風當鳴騶
古塔插蒼靄寺門啓平疇
陟徑既紆鬱馮軒亦摶流
雲旗裊香霧金像明清秋
昔賢論道處松栢深且幽
鴻飛渺滄海龍去空靈湫
懷人已寂寞對景空淹留
興闌成遠別馬首山悠悠

自衢州至蘭溪

秋郊歛微雨霽色澄人心振策率廣路逍遙散煩襟踈
煙帶平原薄雲去高岑湛湛水凝碧離離稻垂金薺麥
霜始秀玄蟬寒更吟幽懷耿虛寂好景自相尋心契清
川流目翫嘉樹林歌傳滄浪調曲繼白雪音仙山在咫
尺早晚期登臨

九日舟行至桐廬

杪秋天氣佳九日更可喜衆人競登山而我獨泛水江
明野色來風淡波鱗起蒼翠觀遠峰沈寥度清沚沙禽

泛悠颺岸竹搖靡靡汴湍懷謝公臨瀨思嚴子紫莢空
俗佩黃菊漫妖蕊落帽非我達虛壘非我恥扣舷月娟
娟濯足石齒齒澄心以逍遙抵流任行止

從軍詩五首送高則誠南征

少小慕曾閔窮閭兀幽棲丘園賁嘉命通籍廁金閨握
筆事空言塊焉愧梁鷄不如屬橐鞬結束習鼓鞞廟筭
出帷幄白日收虹蜺劍光帖滄溟旗尾縣鯨鯢振旅還
大藩歌舞安旄倪拂衣不受賞長揖歸蒿藜

江鄉積陰氣二月春風寒壯士縵胡纓伐鼓開洪瀾長
風翼萬軸撇若橫海翰馬銜伏轅門翊衛森水官仗鉞
指天狼怒髮衝危冠

按節肅徒旅神劒宵有聲揮揮大旗動烈烈刁斗鳴仰
看太白高俯視滄波平王師古無戰景獮安足烹

人言從軍惡我言從軍好用兵非聖意伐罪乃天討運籌
中堅內決勝千里道雷電馘蛟鼉雨露澤枯槁懷柔首悛
獨延訪及黎老牧羊必除狼種穀當去草凱歌奏大廷

天子長壽考

清晨絕長江日夕次海濱北風吹旆旌軍動速若神令
嚴戎馬間九陌無驚塵伐鼓震溟嶠揚帆役鮫人鯨鱗
京觀築鱗醢華筵陳嗒嗒布穀鳴祁祁農鳴春去子還
故鄉悲喜集里鄰荷鋪啓瓦礫再荷天地仁撫綏屬有
望世世爲堯民

蛟谿詩

蛟乃龍之徒隱顯異凡質屈蟠深壑環靈變不可悉清

溪瀑百湍漱滌見冽寒颯黯離晶陰電煬幽室超騰
雲雷溪訶禁鬼神謚應龍翔中天溲汗濕箕畢大江揚
濁瀾鬣蜃恣狂譎閉藏當有待保養慎無失搜竒凜精
魄跼步迷故術谿巖生長風林木暮蕭瑟

題林以仁平反詩卷

木伐豈再植壁毀寧復完議獄有緩死聖言垂不刊兩
造既偏聽無辜構凶殘况復使其孥流離播夷蠻司牧
盡瞠視佐使獨悲酸抗詞動鬼神潤澤生枯乾死者縱

不生魂魄亦獲安孤兒雖不夭且得依故山聖人邁種
德惠及毛與翰云胡任民寄視之如草菅爲君歌此曲
歌竟起長歎

送僕世南參政分題得虎林

深林合蒙龍仰視不見日中有白額虎哮吼恣狂獠怒
睛谷搖電掉尾原簸颺牛羊困攫取樵牧萃憂恤相公
鎮方面化捷影響疾百靈肅號令萬恠悚潛逸昔出晝
需朋今行夜辭匹泰山絕悲啼牛哀返初質豈獨惠斯

邦四海望寧謐

題山水小畫

谿上春始還微波動芳浦樹暖欲生烟山明初過雨美人期不來桂檝怨蘭杜佇立忽懷愁漁歌起洲渚

送田生歸鄉

少年客他鄉還鄉反如客莫驚新井里乃是舊阡陌歡笑集姻親觴酌上班白老翁愛英俊慰問至日夕應憐鄰舍兒魚龍兩縣隔

題李伯時畫淵明歸來圖

江左昔潰亂桓盧遞相尋劉裕起寒微長驅掃氛祲秋
草雖未枯霜雪已駸駸陶公節義士素食豈其心我才
非管葛誰能起淪沉所以歌去來歸卧五柳陰悠悠多
感激愴恨寄謳吟哲人貴知幾芳名留至今展圖三歎
息懷古一何深

題朱孟章虞學士送別圖後

秋郊一盃酒握手念將離落日照野水涼風生樹枝今

朝重相憶青山如舊時鬢毛非松柏爭得不成絲

題老翁騎馬圖

少年遠征役及歸鬢已霜戰甲零落盡空餘弓箭房老
馬同死生蹴踏沙磧長故鄉此何極仰看鴻雁行

明齋詩爲湖廣陳進士賦

客從于闐來遺我盈尺璧晶光射雲漢璀璨生五色置
之暗室中鬼魅皆辟易願持自照身不用持照人

寄題江東蘭逸監司瑤芳亭

江籬悲楚佩叢桂空秋霜茲花特秀絕得升君子堂艷
色非我貴皎潔有餘光仙人羨良夜鳴玉來琳琅纖雲
淡華月色映青鳳凰飄颻白霓佩左右參翺翔衆卉不
敢傍瑤臺清且涼聞有千歲實其味如瓊漿願持壽明
主天地同久長

題揭伯洪山居圖

黃埃晦城市赤日燠逵道榮華能幾何未若山居好啓
扉對平林闢徑入芳草丹崖翠蘿映青嶂白雲抱世事

幸見遺幽趣堪獨討新晴景物佳緩步隨野老倚巖聽
鳴弦息陰憇華葆蜂亂覺春暄鴻驚信秋早無榮謝馳
驅有酒任傾倒但願長兒童稼穡以爲寶

會稽張氏春暉堂

喬木生山阿碩實秋離離誰知茂育功乃在陽春時丈
夫佩玉玦壯氣東西馳列鼎未酬歡倚門已生悲君看
斷根草引蔓復何爲逝波不可駐感激成吾詩

張子英閑止齋三首

鳥飛止茂林魚游止深淵步止辭路躋語止絕悔愆虢
輸升高壁朽穀消腥涎夸父逐羲和渴死大道邊所以
知止者不爲物所牽擺落塵網嬰寂寞守自然悠悠觀
羣動默默全吾年

閒居安所止自古有陶公柴門蔭高柳左右來清風
槿籬密復踈下有黃菊叢摘花泛濁醪嘯歌撫孤松
馬耀長衢視之如蒿蓬

築室在城市而無闐闐聲非闐遠人世慮滌境自清
圖

書堆几案花竹當簷楹釀酒香滿甕賓至即共傾黠陟
吾不知寵辱吾不驚百歲聊復爾孰爲身後名

耕雲詩三首爲堵無傲作

青山何逶迤白雲自悠悠數畝幸可耕此外更何求整
耨候時雨荷鋤適東疇凱風拂蘭蕙林薄鳴鳴鳩我麥
既拳拳我禾亦油油食力分所安但願歲有秋王祖及
時足尊酒聊相酬

八月白露零九月築場圃稻梁已映遂梨棗亦盈塢耕

耘幸就畢一飽諒可取斗酒烹黃鷄殷勤會田父但願
守令賢邑里得安堵無事苟安居明朝復相聚

朝耕原上雲暮宿雲間屋雲來動丹青雲去澄翠麓坐
看雲變化卧見雲起伏斯湏不可期飄忽鳥過目濯足
臨寒泉息景蔭嘉禾飯蔬勿云惡無憂勝梁肉長歌招
隱詩清風滿空谷

壬辰歲八月自台州之永嘉度蒼嶺

昨暮辭赤城今朝度蒼嶺山峻路屈盤峽束迷畧景鎗

訝出風門坎窗入天井冥行九地底高闕羣木頂瀑泉
流其中儼若洩溟滓哀猿嘯無外去鳥飛更永僕夫怨
跋涉瘦馬悲項領盜賊追天誅平人遘灾青佇立盼嶽
岑心亂難爲整

夢草堂遣懷

即事在自得彊歌非正音所以春草句聲價重兼金若
人千載下遺響邈難尋淒涼一池塘賴爾得至今我來
當杪秋天淨橫潦沈枯荷有餘馨衰柳無殘陰鼓鼙響

未已山水意徒深感時念兄弟惻愴傷我心

在永嘉作

高屋集飛雨蕭條生早寒我來復幾時明月缺已團浮
雲蔽青天山川杳漫漫狐狸嘯悲風鯨鯢噴重瀾孤雁
號南飛音聲悽以酸顧瞻望衆梓慷慨起長歎願欲凌
風翔惜哉無羽翰中夜百感生展轉不遑安枯荷響西
池搗葉鳴林端寥寥天宇空冉冉時節闌舉俗愛文身
誰識章甫冠河流未到海平陸皆驚湍旗幟滿山澤鳴

金天四庫全書
卷三
呼行路難

蟾室詩為台州棲霞觀道士作

蟾是蝦蟆精誰令居月宮
淒其羈旅身竟作蝓月蟲
我心有靈丹光與日月同
子能精鍊之可發天地矇
照灼六合外安事一室中
哀哉爬沙輩局促棲樊籠

癸巳正月在杭州作

春陽動萬物衆草皆已抽
嚶鳴亦和悅我何獨懷憂
鯨鯢未道醢豺狼滿山丘
鳳凰竄荆棘烏鳶自相求
浮雲

蔽蒼穹天路阻且脩風沙日暮起鍛羽安所投悲來怛
中懷泣涕從橫流

江城陰氣凝積雨春淒涼出門何所見但見瓦礫場新
廬各有前店舍亦已張市人半荷戈使客盡戎裝回首
舊遊地慘淡寒烟黃悵焉念所思惻愴心中傷

徘徊西湖上愴恨有所思所思不可見涕淚下沾衣死
生一瞬息逝者安可追狼曠信君子李陵非男兒

鍛鐵當用椎析薪當用斧拔蓼而植荼去辛還得苦峨

峨九陽門衛以豹與虎微微螻蟻忱鬱鬱不得吐

登卧龍山寫懷二十八韻

暮春時雨餘原野皆秀色流雲暖芳甸惠風暢輕翼顧
茲景物佳崇岡緬登陟山川糾紛錯疆畝互紆直淒涼
神禹穴偏仄句踐國玉簡闕玄緘銅牛啓雄德霸氣浩
江河王風散荆棘感今情軫鬱懷古心愴惻東溟尚波
濤中原未耕織無能事蕭曹妄意追契稷蹇產蒐屢遷
逶遲足猶側良辰復幾何白日忽中昃周流睨圓方俯

仰觀動植有水必趨東無星不拱北宗社固神靈至尊
實恭默殷王伐鬼方尚期三年克苗頑負險阻終竟膺
竄殛天戈向無前况乃誅鬼蜮竊聞海濱民決皆疾狂
慝荷爰思一奮所懼官未識朝廷鑒往轍中道誅貪悞
主將敦書詩志士願盡力諸公總英俊矯矯百夫特愚
生諒踈拙千慮冀一得農人奉壺漿遲爾殄蝨賊采薇
戒懷歸伐檀慙素食白雲在青天可望不可即浩歌梁
甫吟憂來憑胸臆

立夏日有感

朝旦天宇清逍遙步庭除
溫風自遠至綠樹嘉有餘
登高展遐眺萬象各以舒
念此客行久感彼時節徂
退食恥尸素進思愧庸駑
仰視日月高俯察川原紆
願欲凌風翔周流觀六虛
天路脩且阻惜無竒肱車
倚松翫懸蘿藉茅想連茹
公叔實尚賢寧武不能愚
何當脫塵鞅歸卧園田居

贈柯遂卿一首

并序

今年夏四月余至台聞柯遂卿抗言釋誣囚事甚異而
偉之夫天下之大豈無慷慨激烈之士見義而勇為之
者哉其作也非有私其進也非有求觸于其心形于其
言發于其言信于其事可不謂之大丈夫哉惜其晦而
弗彰也於是乎為之詩曰

雷霆蟄神威妖蜃躍海濱將軍戰敗死玉帳空無人腥
涎之所被蛭蝨皆蛇鱗天弧不張弦民情曷由申縣講
亦令典奉行在明仁誰令姦宄徒並緣逞頑囂俄然齒

髮軀化作豺狼身剝金既無畏况復在平民壯哉柯夫
子義氣衝九旻曳裾公府門抗論回星辰坐令霜雪間
朽骨生陽春睨視夸毗兒精蒐散飛塵我忽耳聞之肝
膽張輪困安得似卿輩落落千百人出應休明時翊贊
臯陶臣旌別鸞與梟再使權衡均上天意茫茫感歎空
悲辛

贈周宗道六十四韻

天弓撥其弦平地躍虎狼腥風扇九澤濁霧干太陽瑣

瑣蚊與蝨亦沸如蜩蟬帝閭隔蓬萊弱水不可航螻蟻
有微忱抑塞無由揚遙遙草茅臣怒切忠憤腸披衣款
軍門披腹陳否臧曰走居海隅詩書傳世芳感荷帝王
恩祿食廁朝行走身非已軀安得緘其吭走有目擊事
敢布之廟堂永嘉浙名郡有州曰平陽面海負山林寔
維甌閩疆閩寇不到甌倚茲爲保障官司職防虞當念
懷善良用民作手足愛撫勿害傷所以獲衆心即此是
似墻柰何縱毒淫反肆其貪攘破廩取菽粟夷垣劫牛

羊朝出繫空橐暮歸荷豐囊丁男跳上山妻女不得將
稍或違所求便以賊見戕負屈無處訴哀號動穹蒼斬
木爲戈矛染紅作巾裳鳴鑼撼巖谷聚衆守村鄉官司
大驚怕棄鼓撤旗鎗竄伏草莽間股慄面玄黃窺伺不
見人喘汗走悵悵可中得火伴約束歸營場順途劫寡
弱又各夸身彊將吏悉有獻歡喜賜酒觴殺賊不計數
從橫書薦章民情大不甘怨氣結腎腸遂令父子思化
作薑與蝗恨不斬官頭剔骨取肉嘗纍纍野田中拜泣

禱天皇願得賢宰相飛牋奏巖廊先封尚方劍按瀆誅
姦賊擇用忠蓋臣俾之提紀綱彎弧落鷓鴣梟雉棘出鳳
凰尚可存予遺耕稼納官倉失今不早計如水決隄防
而後事堙築勞費何可當走聞疽初生灼艾最爲良炊
成施剗割所憂動膏肓邊戎大重寄得人則金湯鑿遂
到渤海盜賊還農桑張網入廣陵健兒跪如羊苟能任
仁智勿使儉邪妨孟門雖險艱可使成康莊走非慕爵
賞自驚求薦揚痛惜休明時消息無其方又不忍鄉里

鞠爲狐兔場陳詞未及終涕泣下滂滂旁觀髮上指側
聽心中傷天路阻且脩不得羽翼翔可憐涸轍魚待沒
西江長況有蛟與虬磨牙塞川梁旄丘靡與同載馳徒
慨慷嚴冬積玄陰天色慘以涼衆鳥各自飛孤鸞獨傍
徨冥冥麗山雲木葉殷清霜子去慎所過我亦行歸藏
遣懷

鴻鵠會高風拂翼凌雲霓蛟龍不得水葺鱗因塗泥惟
昔望諸君一戰舉彊齊秦穆伯西戎能用百里奚傳說

築商巖太公釣磻溪韓信寄食飲孔明躬耕犁立賢苟
無方曷問鷲與鷲驅車上太行峻極不可躋重雲蔽曾
岑流潦絕荒蹊豺狼當我嗥魑魅向我啼顧瞻望九州
欲去惑東西嘉穀委蔓草良田養蒿藜乘黃避跛鼈狐
貉驕虎豹誰言縱壑魚竟爲觸藩羝長夜起嘯嘆邪氣
憑我臍夢登舜蒼梧遙望禹會稽援琴奏將歸日暮增
慘悽盲飈正滂勃孤鳳將安棲

三月八日偕徐成中楊澄源李子庚吳溥泉董

朝宗黃中立程邦民湯仲謀王文明遊南鎮

得禽字

積雨霽芳甸凱風來遠林逍遙出郊郭徙倚散煩襟桂
棹蕩清漣長裾曳輕陰肆覽夏王陵流觀秦帝岑黃熊
安所之荒楚自蕭森仰翫卉木榮俯聆泉石音洋洋潭
底魚喑喑枝上禽昭融見天德澁澆怡人心况有文彥
友溫恭比瑤琳獻爾禮不愆詠歌思彌深良辰豈易得
嘉會難屢尋願作膠與漆無爲商與參殷勤屬此章冀

以代黃金

送馬生遊京師

東山夜雨急鑑湖春水深之子遠于邁祖帳清江潯白
日映蘭皋青烟起松岑豔舞激回風長歌裊哀音何以
慰離懷八珍盈釜鬻何以將素情贈言比瑤琳京畿佳
麗地多士紛如林構厦徯檀栾去疾須苓參殷勤治安
策悃款大寶箴敷陳草茅情啓迪帝王心斯人邈永矣
繼之在于今勿羨蘇季子自侈多黃金

別峯和尚方丈題唐子華山陰圖

連山走陂陀太谷入晻曖屋藏深樹中路出巨石背烟
雨時有無澗谷互顯晦輕盈曳飛綃縹緲沃浮黛雄梁
矯脩鬣駢駢駁文璫崢嶸紫霞高屈曲白水匯陰森神
鬼宅奮迅龍馬隊風雲氣象寬日月光烟碎借問此何
鄉或有捐余佩荅云越山陰信美無與對自從永和來
燕遊推勝槩佳人去不還盛集嗟未再唐令實好奇擬
拾歸畫繪上人遠公徒我亦淵明輩會晤屬時艱觀覽

增感慨故園沒灌莽舉足蛇豕礙放歌自太息激烈驚
厚載

送孔世川赴江西儒學提舉

鏡湖荷花發耶溪菱葉生送君何所之去作西江行西
江大藩地卓犖多豪英文能絢雲漢武能壯干城浩蕩
吳楚間頽波障東傾鳳凰不妄集梧桐匪空榮行行勿
憚遠疊疊崇令名

我辭西江歸倏忽十二秋每望西江雲思心悵悠悠恨

無排風翼安能凌虛游故人渺天末可夢不可求邂逅
送子行感我涕泗流登山有脩蛇涉水有長虬逝者如
零雨一落誰能收

爲竺西和尚題谿山茅屋圖

青山十畝餘茅屋數間足高樹結浮烟脩篁茂深綠孤
松無鄰舍生理不拘束開田種禾稻間以黍與粟中歲
幸西成青黃被谿曲鳧鷖與鴻鴈亦各得所欲清秋霽
涼雨礪底石如玉野老時見過杯酒聊與屬但願官長

廉吏卒莫我毒耕稼納王租世世還相續

春谷詩爲竺西和尚賦

條風自東來雪消春谷暖荒畦碧草短清池細泉緩雜
花明錦繡時禽響弦筦道人閑無事習慣牛頭嬾過橋
禪杖落坐石袈裟袒日暮精舍歸燈龕白雲滿

四月二十二日郊外游得水字

草根螻蝻鳴湖上蒹葭靡繁林溺深綠清池散圓紫離
居昧節序陶情賴佳士泛舟出郊甸緩步信所履壺觴

展倡酬及此晴日美嘯歌望山川慷慨集悲喜豺狼未
鼎鑊郊野尚多壘鐵衣掛儒冠好爵逮麻屣吾儕幸味
苦得似道傍李無思身外憂適意聊復爾歸雲入禹穴
返照射宛委烏啼樹有風帆過煙生水興盡各言還月
明城角起

題枯木圖

松以直而伐桂以芳而攻睽此屈曲形擁腫又空中身
爲螻蟻家根作螻蟻宮蠹皮化土壤朽腐不可烘輪困

盤石間幾歲經霜風明堂構羣材梯梁匝硿礮斧斤獨
不到凋落還茫茫知兵牘孫子善射殲有窮脊種伏短
劍韓彭歎良弓豈如蚩蚩負薪翳蒿蓬飢食渴則飲
不識王與公白髮死枕席無事傷其躬贈詩持盞還會
尋黃綺翁

五月三日會王氏南樓得漱字

蹇步屬時艱睽違苦多感偶寄越城隅頗喜得幽寂炎
夏天象明羣山皎如滌况有文獻友同心不離逝雖無

鼎俎盛斗酒聊相覓登樓望禹穴慷慨生感激玄珠淪
赤水金簡不可覲崩騰六合內慘淡多羽檄天弧弛虛
殼封豕逃礎鎖誰見野田中白骨雜瓦礫憂來歌一曲
客淚再三滴晚風吹晴霞海色映石壁展詩肆遐眺嚴
令困勅敵諸公俱鳳麟愧我獨樗櫟危途知驥馭勉旃
樹功績無然學兒女愴恨山陽笛

題西旅獻葵圖

鳴鳳啓至德鎬京作王家萬國戴元后懷柔無邇遐

矣西土人占風慕中華毳服耳金鐻拳毛眼窈窕獻葵
越重譯辛苦涉流沙歸仁自彼心務廣匪予夸蹇蹇大
廷臣忠告猶咨嗟卜年盈八百分得未爲奢云胡叔世
主黷武生諠譁枸醬毒南徼河源訛西槎哀哀萬夫命
驅以易驪駟暴蔑文祖訓大貽天下瑕畫圖漫寫形索
意良無涯太康焚雉頭宮闈茁妖芽開元灰組繡驪岫
荒淫哇夫豈不有初蕩心生百邪望美洛陽都赤符炳
流霞玉闕閉高門軍賓絕相加鳩杖老貌貅虎落謁桑

麻煌煌中興業奕奕流芳葩謙光信受益知足復何差
感事重懷古因書戒矜誇

題錢舜舉折枝山茶

歲暮寒氣結百卉無遺榮懿此獨不凋方冬燼紅英有
似節義士特立不夾貞幽居屏紛雜丹鉛寄深情葱蘢
翠雲翹綴以流霞精玄霜避晨豔華月助宵明坐令桃
與李無言愧微生贈詩勿遐棄貴之比瑤瓊

遣興六首

避地適他鄉息肩謝羈束生事未有涯
暫止聊自足南園實清曠可以永幽獨
曾樓面羣山俯見湖水綠雜英被郊甸
魚鳥得棲宿登臨且慰意未暇計遠躅
聖賢有遺訓知命夫何卜

積雨兼數旬天氣涼有餘青苔交戶庭
始覺人跡踈地主多閒園可以種我蔬
兒童四五人蔓草相與鋤既倦則歸休
卧閱床上書無事且爲樂何者爲名譽

夏日苦太長夜景良可愛華月吐曾岑
遙天碧如黛披

衣更登樓稽山正相對澄湖晶空明浮雲去無礙遺榮
世何人賀老今不在涼風吹毛髮坐久增感慨

溽暑百體倦曉涼正堪眠飛蚊何營營繞鬢鳴相煎拍
之不勝多揮去還復前世亂有骨肉逃生幸完全細微
何足較此意誰當傳

綠樹何陰陰良苗亦離離開窓招遠風赤鯉躍清池雲
日釀晴光芰荷有餘姿宴坐偶自得悠然遂忘飢富貴
不可求守分勿復疑

迂踈乏世用，矯情非所安。
投簪謝時輩，聊得心中寬。
回首望故鄉，枳棘日以繁。
譬彼水上萍，隨流且盤桓。
樓頭好山色，晴雨皆可觀。
未知明朝事，且盡今日歡。

久雨壞墻園蔬盡壓悵然成詩

晚歲逼豺狼，漂搖去鄉土。
囊橐罄留儲，釜甑恒苦窳。
開畦種蔬菜，撥借荷地主。
晨興率童稚，樹藝躬僂僂。
瓠實正纍離，茄花亦爭吐。
魚肉方絕交，恃此當醢脯。
悲風吹江干，浩蕩十日雨。
幽泉湧陰竇，高墉圯脩堵。
蒼蔓壓泥

沙朱苞埋宿莽淒涼紫芝英乃與朝菌腐數竒值時危
一飽不敢取天地有窮愁每望貧家聚青苔滿頽墻日
暮空倚柱

題鮮于伯機書杜工部詩後

少陵昔避亂買屋西枝村卜鄰得贊公聊可與晤言四
郊鬪豺虎煙塵塞乾坤中宵望北辰慘戚衰老魂我今
亦漂泊不得歸本根感此一太息欲語聲復吞

次韻和托音宗道感興三首

索居守貞素，久已忘世機。晨興夕還寐，不知時節違。庭前有芳樹，宿昔容顏非。巢鳥去安之，寒蟬鳴亦稀。居人歌北風，客子歎無衣。浮雲結陰翳，白日少光輝。鴻鴈號南翔，蟋蟀在中闈。榮華如流水，一往何當歸。

松柏守孤直，不爭桃李色。明星在青天，有時化爲石。春風車馬塵，竟日翳紫陌。寧知禾黍地，舊是王侯宅。蓬萊有仙藥，求之不可得。霜風吹林木，歲暮徒愴惻。

鈎刀方用世，掛壁干將閒。剪松養荆棘，匠石空悲酸。驅

車陟太行日暮多險艱玄冰膠大谷脫粟貴琅玕魑魅攬人魂豺狼食人肝路遠無羽翼何由得飛還

題春江送別圖

春江水悠悠行人上蘭舟春雲散江樹行人重回顧嘉會未有期離心渺千里願作還山雲莫作東流水

琴清堂詩

亭亭嶧陽桐斲爲綠綺琴絙之朱絲絃彈我白雪音虛堂夜迢迢華月耿踈林鳳凰天上來虬龍水中吟曲罷

起太息無人知此心

田家

田家無所求所求在衣食丈夫事耕稼婦女攻紡績侵
晨荷鋤出暮夜不遑息飽暖匪天降賴爾筋與力租稅
所從來官府宜愛惜如何恣刻剝滲漉盡涓滴怪當休
明時狼藉多盜賊豈無仁義予可以弭鋒鏑安得廉循
吏與國共欣懌清心罷苞苴直養民瘼國脉

渡江遣懷

東風吹滄江白日照花柳山川半顯晦積雨晴未久青
陽好氣候羣物競苞剖農夫荷鋤犁各自登隴畝鴈鳩
鳴相應陂水光瀏瀏天地起戈兵荆榛塞原阜茲邦特
按堵庶足憇奔走故鄉有園田委棄沒藜莠老母年八
十頭童齒牙朽癡兒始垂髻出入寡朋友衣衾雜絮毳
羹食乏菘韭儼然多病身全家倚糊口那令更遠去憂
念成疾首千金聘宿瘤顧謂西施醜鹽車推太行驂騶
不如狗况我鴛蹇質困踣畏培塿濟河湏巨舫將焉用

瞿正朱弦絙琴瑟曷中洪鐘紐剡蒿射犀革空貽養由
咎巍巍神祖烈乾坤讓高厚蠢茲蛇豕儔乘間恣哮吼
非無熊羆臣土產分左右更張吾豈能習慣彼已扭鹿
麋曾傷虎宵邁驚狸夙寤言亂心緒忽若醉醇酒踈賤
等蚍蜉捐軀復何有夷吾匪每生鞠育未宜負愴恨憶
松揪淚濕蓬鬢垢道途正艱阻進退維窅白向風一陳
情何由達南斗

題山水圖

江上何所有高低千萬峰結廬覆以茅取足聊自容綠
樹既翳蔚清溪亦溶溶地僻無車馬猿鳥得相從日落
沙際明寒煙澹踈松蒼茫雲霞外隱見青芙蓉悠然一
舸還好景時獨逢歸來山月出古刹鳴昏鍾

若耶溪杳郭深居精舍

上人好山居入山惟恐淺紆餘涉淵沄結構依巖嶠岡
巒外挺拔水木終隱顯其前對鵝鼻突兀正冠冕其傍
連木禾積翠森偃蹇後有獅子巖酋萃露齟齬春花炫

陽林秋草馥陰畎高通雲雨過側見星斗轉桃源不遠
求箕頽安足踐我來三伏涼羈懷忽如展談經道心融
聽法俗慮翦踈窓夜深啓孤月掛遙峴空濛白毫光閃
鑠動岨巘何當此卜隣永用辭澆酒

大熱遣懷

盛夏火用事長日不可堪熱汗發我膚如泉溢穹堪清
晨登樓望四野皆紅嵐坡坨會稽山縹緲浮鬱藍何由
作雨澤一洗暘與酣湏臾玻瓈盤湧出琉璃潭雜氣若

絳旂飄颻散空嶺朱光燹九幽天色熯以醴樹木首咸
俯鳥獸聲盡鑿玄冥將禹彊側身入控龕淵蛇葺短鱗
山龜灼枯曬悍熊伏朝鞬困龍縮秋蠶焦根裂埴斷斃
鷓蚌脯含水井爲湯池冶容成病領渡水翅帖帖守門
口舛舛蜩蟾輕綃翼依陰萃楓柵沸渭泊靜寂噪聒亂
語談蒼蠅丹砂頭羣飛逐烹暗拍之適汚手驅之死仍
耽對食憚下肱引飲輒傾甌撫几炎欲燎披衣重猶函
慨彼征戍卒荷戟忘寢寐棄絕骨肉愛不得同苦甘但

聞盜賊熾未見王師戡郊原虜掠遍餽餉那能覃况乃
隆暑節蒸鬱非所諳用兵貴拙速將帥當懷慙沈冥及
暮鼓兩目脂流泔拂袖招遠風衆星爛天南河漢上昭
回烟霞遠鬢鬢且喜辰極明願覩戎馬倏雲門連鏡湖
林壑清且涵豈惟隔埃壘庶足憇負擔惜無五畝宅偃
蹇投吾簪

六月十八日自天章入城作

天淨山氣涼溪渾夜來雨籃輿度踈翠初日照平楚高

林半長烟好鳥時自語煩襟得蕭散似欲忘羈旅何當
盜賊息比屋豐禾黍逍遙丘壑間鹿麋以爲伍

晚同方舟上人登師子巖作

落日下前峰輕烟生遠林雲霞媚餘姿松栢澹清陰振
策縱幽步披榛陟層岑槿花籬上明莎雞草間吟涼風
自西來颺颺吹我襟榮華能幾時搖落方自今逝川無
停波急弦有哀音顧瞻望四方悵焉愁思深

七月四日自深谷之靈峰作

平旦出雲門亭午至靈峰山盤澗縈紆谷深巖錯重竹
露滴皎皎林霞散溶溶度石苔蘚滑披蘿烟靄濃頗喜
禾黍成可以慰老農野草各有花照水似銜容徐行恐
觸熱聊憇崖下松時聞幽鳥鳴亦足開心胸慨懷陶隱
居丹竈今無蹤干將與莫邪俱已化爲龍空餘遠山色
萋萋青芙蓉

清修院良上人浸月軒

華池浸皓月高下共清瑩烟如長明燈飛入大圓鏡又

疑鉛汞爐伏火發宵映曾軒開九秋萬象出昏暝月來
池色動月去池色定窺臨足遊適翫味見心性珍重無
生侶於焉託清淨宴坐六塵空百魔從律令

普濟寺用恭行已上人韻

偶從靈峰來遂作雙峰遊雙峰何峨峨俯映耶溪流炎
天正埃藹欲往安所投喜見農事成抗稻滿中丘步入
古寺門信美無與儔淥池對徑路水木自深幽飛蘿冒
松栢上有猿與猴登樓散煩熱坐挹山綢繆更愛山下

泉泠泠洩陰溝青苔闕脩竹竟日涼風留披軒眺西崖
煥若丹霞浮神劍去安之起望空斗牛沉思終永夜月
白銀潢秋

題陸放翁晚興詩後

雄劍闕寶匣中夜蛟龍吼男兒抱志氣寧肯甘衰朽松
栴在深谷枝葉拂星斗雖無般匠顧勢自凌培塿昂昂
商山翁矯矯渭濱叟林泉不遐遺軒冕亦固有奈何劉
伶輩賤身若芻狗徒生天地間辜負髮與手三復詠斯

章千載吾尚友

題商學士寒林圖

昔聞商學士水墨稱絕藝今觀寒林圖信美無與儔
淒涼霰雪餘皴掃悉輕脆玄冰刮老骨衣被荷纖荔龍鬚
結瓔珞虎爪出鋒銳鱗皴蝮蛇殼璀璨錯琅玕蒂下有不
死石藍汁沃鬢髻前有赴海湍激濯沙土細青烟曼遙
渚白日淡荒裔蒼茫浮雲外縹緲惑盼昧梧桐早飄落
鳳鳥將焉逝四序若循環歲華在緇翳衰榮各有時至

道惟冥契

題雜畫卷子

山川出雲霓，谿谷藏虎豹。枯樹繒綾身，怪石硯碧貌。竹
枝如琅玕，烟雨昏幕罩。梅花雪中開的礫，珠磊葩蘭獨
稱國香姱，麗最可樂羨。纖草堪藉傷，覃棘能抓宋公學。
元暉駭獸見，騰駒老班性。嗜酒藻思發，餘醪丹丘泣。龍
髯零落江湖擢，顛王食敗筆。得米動盈窖，僧明本靜者。
一藝起衆鬧，展卷見歷歷。聊足解喧嗃，裁詩慕韓豪。瑣

細非所較

題宋子章效米元暉山水圖

昔時米南宮父子同畫癖油然煙雨態千里入盈尺近
代宋尚書筆意妙欲逼置之几格間新舊莫辨識應是
前後身神會造化迹瀉濛迷日月湏洞飛霹靂蒼崖晦
中斷天闕杳高隔洪濤漲無倪龍虎移窟宅農夫怨昏
塾樵牧絕行跡破屋兩三家搖撼已傾側得非杜少陵
無乃陶彭澤簷茅委泥濘籬菊沒狼籍空江之舟檝汗

漫安所適披圖瞻青冥惆悵至終夕

爲賈性之賦松石

老松不搆屢潛跡歸后土千年化爲石詭怪驚地府
都壯輪奐翦截就梁柱嶙峋鋸鑿餘棄置人得取君家
赤玻璃光采奪朝暉嶒峻鐵心堅璀璨霞色古何當呼
吳罍匠以修月斧持獻女媧皇天罅或可補

有客來欸我

有客來欸我自謂儒者儔問我胡不出乃來此淹留我

笑而不答彼問方未休彼我異所志問答寧相投青山
屋外高溝水山下流隱几書一卷寒簷雀啾啾

題趙文敏公畫松

吳興昔王孫能畫世莫及觀其二松圖矯若龍出蟄蟠
根破坤輿拔萃滙原隰交加各軒翥削劣相倚立鼉鱗
撐空青豕鬣振颯颯高藏日月氣清滴雲霧汁垂釣者
何人短棹非妄集五湖多風濤蛟蜃頭角解不如誇澤
間取足鱗與鰓倦眠松影下百竅清涼入慎勿驚松枝

天寒衣袂濕

題三香圖

梅是玉堂花和羹有佳實水仙如淑女婉婉抱貞質山
礬直而勁野處似隱逸分類族雖三論德性乃一瓊臺
耿清夜涼月白勝日霏霏芳氣交粲粲華采溢琪樹讓
晶熒瑶草愧私暱願言永其歡歲莫保終吉

感時述事十一首

天王有萬國撫治不能徧百僚分所司控制倚方面旬

宣貴浹洽付託屬隆眷易置苟無恒勤怠朝夕變自非
鼓氏儔何官匪郵傳矧茲世多故軍府希間宴戎機一
以失蟻穴債臺殿公庭委舊事書牘呈新選來者且遲
遲在者同秋燕偷安待日至退託從私便姦貪遂乘隙
民病孰與言大臣國柱石憂喜相連纏反躬既遺闕何
以率州縣寄與要津人有舌未宜嚙

十羊煩九牧自古貽咲嗤任賢苟不貳焉用多人爲師
行仰供給州縣方告疲差徭逮所歷添官有權宜柰何

乘此勢爭先植其私百司並效尤貨賄從橫飛列坐隘
公堂號令紛披離名稱到輿隸混雜無尊卑正官反差
出道路不停馳狗祿積日月官吏之所希此輩欲何求
朘剥圖身肥

世皇一宇宙四海均惠慈盜賊乘間發咎實由官司云
胡未悔禍救焚用膏脂姻婭遂連茹公介棄草茨農郊
日增壘良民死無期天關深虎豹欲語當因誰

先王制民產曷分兵與農三時事耕稼閱武在嚴冬亂

略齊憤疾戰伐厥有庸那令異編籍自使殊心胸坐食
不知思怙勢含威克將官用世襲生長值時雍豈惟昧
韜略且不習擊剗悍卒等驕子有令亦無從跳踉恣豪
橫鼓氣陵愚恚所以喪紀律安能當賊鋒崩騰去部曲
蟻合尋歸蹤時方務姑息枉法稱寬容寧知養豺虎反
噬中自鍾國家立制度恃此爲垣墉積弊有根源終成
腸肺癰何由復古道一視均堯封

恭狗不噬禦星馳募民兵民兵盡烏合何以壯干城百

姓雖云庶教養素無行譬彼原上草自死還自生安知
狗大義捐命爲父兄利財來應召早懷逃竄情出門即
剽掠所過沸如羹總戎無節制顛倒迷章程威權付便
嬖賞罰昧公平饑寒莫與恤銳挫怨乃萌見賊不須多
奔潰土瓦傾旌旗委曲野烏雀噪空營將軍與左右相
顧目但瞠此事已習慣智巧莫能爭廟堂忽遠筭胸次
猜疑并豈乏計策士用之非至誠德威兩不立何以御
羣氓慷慨思古人惻愴淚沾纓

古人有戰伐誅暴以安民今人尚殺戮無問豺與麟濫
官舞國法致亂有其因何爲昧自反一體含怒瞋斬艾
若草芥虜掠無涯津况乃多橫斂殃禍動輒臻人情各
畏死誰能坐捐身所以生念慮嘯聚依荆榛暴寡憚強
梁官政惟因循將帥各有心邈若越與秦遷延相顧望
退託文移頻坐食挫戎機養虺交蛇鱗遂令耕桑子盡
化爲頑嚚大權付非類重以貽笑顰鼠璞方取貴和璧
非所珍但恐昏及溺是用懷悲辛

五谿舊三苗蛇蚓相雜處其人近禽獸巢穴依險阻起
居任情欲鬪狠競爪距况能識君臣且不顧子父所以
稱爲凶分北勞舜禹先朝慎羈縻罔俾來中土胡爲倏
而至馳驟如風雨見賊但趨趨逢民輒俘虜腰纏皆金
銀衣被俱繡組所過惡少年改服投其伍農家劫掠盡
何人種禾黍盜賊有根源厥咎由官府任將匪能賢敗
劍乃自取竒材何代無推誠卽心膂誰哉倡此計延寇
入堂宇割鼻救眼睛於身竟奚補浙西耕桑地百載安

生聚自從甲兵興徵斂空軸杼疲氓真可憐忍令飼豺
虎追憶至元年憂來傷肺腑

虞刑論小過夏誓殄渠魁好生雖大德縱惡非聖裁官
吏逞貪婪樹怨結禍胎法當究其源剪鋤去根芽蒙龍
曲全宥駕患於後來濫觴不埋塞滔天谷陵頽總戎用
高官沐猴戴母頭玉帳飲酒肉士卒食菜藿未戰已離
心望風遂崩摧招安乃倡議和者聲如雷天高豹闕遠
日月照不該俱曰賊有神討之則蒙災大臣怨及已相

視若銜枚阿諛就姑息華紱被死灰姦宄爭效尤無風
自揚埃嘯聚逞強力謂是爵祿媒黎民亦何辜骨肉散
草萊傾家事守禦反以結嫌猜慟哭浮雲黑悲風爲徘徊
赤子母不憐不如絕其胚養梟逐鳳凰此事天所哀
胡爲尚靡定顛倒胫與頰春秋戒肆眚念此良悠哉

八政首食貨錢幣通有無國朝幣用楮流行比金珠至
今垂百年轉布彌寰區此物豈足貴實由威令敷廟堂
喜新政躁議違老夫悠悠祖宗訓變之在朝晡瞿然駭

羣目疑恠仍揶揄至寶惟艱得韞積斯藏諸假令多若
土賤棄復誰沽錢幣相比較好醜天然殊譬彼締與綌
長短價相如互市從所取孰肯要其痛此理實易解無
用論智愚矧茲四海內五載橫戈爰赤子投枳棘不知
所歸途一口當萬喙唇縮舌亦瘖導水必尋源源達流
乃疏藝木必培根根固葉不枯慎勿庸邇言揚火自焚
軀尚克詰戎兵丕顯厥祖謨

惟民食爲命王政之所先海澨實天物厥利何可專貪

臣務聚財張羅密於羶厲禁及魚鰕鹵水不得煎出門
即陷阱舉足遭纏牽魚休用鞭箠寃痛聲相連高牙開
怨府積貨重姦權分攤筭戶口滲漉盡微涓官征勢既
迫私販理則然遂令無賴兒睚眦操戈鋌出沒山谷裏
陸梁江海邊橫行荷篋籠方駕列船舡拒捕斥後懦爭
彊夸直前盜賊由此起狼籍成蔓延先王務廣德如川
出深淵外本而內末民俗隨之遷自從甲兵興奄忽五
六年借籌計得喪耗費倍萬千回憶至元初禁網踈且

平家家有衣食畏刑思保全後來法轉細百體皆拘攣
厚利入私家官府任其愆大哉乃祖訓典章尚流傳有
舉斯可復庶用康迪邇

秦皇縣九宇三代法乃變漢祖都咸陽一統制荒甸豪
雄既鏟削瘡痍獲休宴文皇繼鴻業垂拱未央殿累歲
減田租頻年賜縑絹太倉積陳紅園府朽貫線是時江
南粟未盡輸赤縣方今貢賦區兩際日月竊胡爲倚東
吳轉餉給豐饒徑危冒不測勢與蛟龍戰遂令鯨與鯢

掉尾乘利便，扼腕要國寵。金紫被下賤，忠良怒切齒。姦
宄競攀援，包羞屈政典。尾大不可轉，聖人別九州。田賦
揚爲殿，中原一何膺。所務非所先，豳風重稼穡。王業丘
山奠，夫征厲末習。孰敢事游燕，哀哉罔稽古。生齒徒蕃
羨一耕，而十食何以奉。征繕長歌寄愁思，涕淚如流霰。

漁樵問答

樵問漁：江湖風波惡，何似采薪人。無憂茹藜藿，漁荅樵
山中何所有，未若櫂扁舟。得魚即沽酒。

丙申二月別紹興諸公

勞生屬時艱將老萃憂感風塵隘九野何土爲樂國茲
邦控吳越名勝聞自昔湖山競竒麗物產亦充斥交游
尚質儉而不事華飾况有良友朋時來慰岑寂全家免
寒餓幾欲忘旅客胡爲復舍此僂俛就行役軒車遠迨
送酒至淚輒滴還鄉人所樂我獨愁苦劇故山有松栢
摧折爲荆棘豈無骨肉親太半生死隔此語不可聞此
景那堪覲愁情如波濤瀕洞胸與臆佇立向穹蒼一歎

雙鬢白

雨中雜詩四首

久晴思得雨既雨久復厭廣庭屯陰氣平陸就昏墊淒
風吹人寒朱火黯無燄水衣上高墉泉溜發枯塹青泥
沒逵道寸步不可覘慷慨成感傷纏綿積憂念

首夏涼風生朝樹結晚色濛濛細雨交慘慘原野黑衡
門長藜莠壞壁穿荆棘念彼征戍兒沾濕荷戈戟囊橐
罄留貲藿菽難充食供輸既乏絕戰鬪何時息巢居者

誰子鼠竄延晷刻田疇沒蓬蒿無處勤爾力旻天高寥
寥仰視不可極

多雨損萬物草爛麥生耳青苔獨得時延蔓及堂祀晨
興視天宇滴瀝殊未已君子懼陸沉小人憂餓死淒涼
大將營鼓纒弧弓弛朝廷竟知否盜賊如流水

離居感時節寤寐不遑安青燈晦壁角簷溜如崩湍屈
指計日月殷憂集多端蛙黽爾何知叫噪喧草莞中夜
攬衾稠淒淒陰氣寒鳳凰鍛羽翼早飛避鴟鳶撫几一

長歎聲出心已酸

次胡元望郊行詩韻

誰言公館清晨氣晚未散豈乏樹蔥芊尚有花爛熳美人隔巷陌可念不可喚温温夜光璧幽草潜璀璨鄙夫競喧譁達士善大觀世情如秋蓮零落風中辦少年喜紛紜談笑輕絳灌進取務出奇周慮非習慣逝水難重迴芳時愁坐換元臣鎮方面邊戎仰成美應憐四郊外荆棘滿耕畔悽悽憂葵女惻惻撫床瓘興懷增感傷展

轉過夜半起行視青天星河色凌亂安能作野馬脫畧
謝羈絆

夏中病瘡戲作呈舒穆魯公

晚浴蒸骨毛蹭蹬張萬孔不虞小人風堀堞觸捧塌長
驅毒暑氣熇若燎發惚鑽膚入經絡鍵鑰若衝捅蚩蚩
水帝子鼠伏伺腥脂癡瑤與狡瓊並出助推桐天君赫
斯怒六軍躬自董丹元將爽靈逆擊闕哮噴主客相批
亢乾坤爲搖動初交且足足再接遂咏咏脩脩蝨股切

臧臧鴟翅駿蕭颯葉鳴颺輓車轉轆驚沙走憲罕落
雪旋蠛蠓凌競剝床辨敲琢搖佩琫玄冰結太陰河海
溢銀汞俄然一陽復日脚舒瞬矇微微細泉湧拂拂輕
煙煽柔枝披婀娜弱葉散萋萋燿如九烏燄熾烈昧窺
酸炎炎祝融火炊灼煬龍從龍奔歸大漠虎逸蟄空隴
烘煖熟金石閃爍歎蟬螗肆伐殄噐噐止齊安惜惜岑
頭釋戴壓雨汗渙流滄黑艷羣醜馘黃庭百神總頗恠
天地氣去來何倥傯集如蟻赴羶散若蜂辭桶棄置且

勿思宵鼓聽謹謹

秋夜感懷東舒穆魯公申之

不寐知夜長起視天宇闊散漫草上風朦朧雲間月寒
禽鳴踈樹黃葉墮階闥俛仰觀羣物惆悵不敢發誰云
螻螳壤能使泰山飢蒼鷹鍛六翮狡兔營三窟何當威
弧正王旅得肆伐箇輅雖微材尚可施羽箭豈意風浪
舟心猶隔胡越士生非金玉有足難自達周發不恤緯
楚放常懷闕平生葵藿情忍與霜露歇玄冰膠坤軸非

君孰能幹申章匪繁辭悲憤不可遏

次韻和舒穆魯公用元望韻遣興見寄

鶉鳩勸春耕桴鼓帖宵邏撫循餘暇日珠玉生咳唾時
維青陽初天子在左个布德順木令萬國罔不和祿食
自紛紜撫字誰最課幅員若金甌絲髮無罍破涓溜可
摧山機禍不在大中夜登高樓遙瞻太微座乾坤泝寥
落日月飛鳥過憤惋空有心盛時嗟已蹉

以野狸餉舒穆魯公因侑以詩

野狸性狡猾夜動晝則潛繫之籠檻中耳弭口不啣當
其得意時足爪長且鈎跳踉逞俊捷攫噬靡有饜貧家
養一雞冀用易米鹽爾黠弗自食尋聲竊窺覘破柵舔
肉血淋漓汗毛髯老幼起頓足心如刺刀鏃東鄰借釜
蹄西鄰呼獾獫繫餌翳叢灌設伏抽陰鈐彼機歟已發
此欲方未欵絲繩急纏繞四體如羈黏野人大喜慰不
敢私烹燂持來請秤斷數罪施剗劊

七廉切

使君鎮方

面殘賊職所殲械送致麾下束縛仍加箝腥膏忝污鉞

羶醬或可醃芼芳和糟醬順賜警不廉黃雀利螳螂碎
首泥塗霑烏鴉殉腐肉噴墨身受淹此物亦足戒申章
匪虛誨

和舒穆魯公種棘用胡元望韻

力役困年侵種棘代遮邏豫防苟無失有地孰敢唾風
條曲抽乙雨葉細垂个是時春載陽土脉如膏和分疆
督藝植勤惰各有課揮鋤綠烟披轉石蒼蘚破稍看萌
藥長漸覩根株大結蔭冒長堤開花映高座揀公不敢

金
卷三
窺路子那得過慨慕陶公言罔俾分陰蹉

和舒穆魯公得令字

勾芒發陳根北斗轉東柄衆星各參差威弧何時正好
生雖聖心明刑亦王政括人慎謀始斯焉獲終慶徒言
兩階舞可以懷逆命不見三危山萬里竄梟獍世德異
唐虞民情好爭競那無跗扁醫而有膏肓病波濤地軸
孰虎豹天關夏雨露當春滋風霜及秋勁誰能奉明主
順天行號令

正月廿三日得台州黃元微書有感三首

世亂網恢恢斯人亦淪翳數竒當何如窮途難爲計
盲風振喬木碩果失其蒂虎豹落機檻坐服輿皂制玄珠
迷罔象白日慘陰曠涉水水有蛟入山山有珉棄馬感
須無直道懷柳惠青冥無羽翼悲來夜迢遞

結交無疏戚艱難見平生金石苟不渝萬里如兩楹重
山非云遠邈若遼與荆巒婉豈不懷蛇虺正驕獍手持
故人書心念故人情開書問故人淚下如雨傾

客從何鄉來遺我尺素書道路險且艱故人情有餘妖
氣晦斗極黃濁混龍魚何荃不爲猶何麟不爲軀殷勤
故人心炯若明月珠投之千丈泥萬古光不渝安得致
閭闔以照君王車

次韻和舒穆鳴公春雨見寄

愁陰沙陽景孟春猶苦寒騰雲湧巖岫落雪蔽江干街
衢溢橫潦井谷生狂瀾誤疑蛙黽窟中有蛟龍蟠復憂
扶桑日坐爲黃濁漫顧瞻望四郊側足不遑安却秦慕

魯連存齊想田單玄髮雖向改壯心終靡殫小人務苟
且君子慚素餐高牙對多壘肉食徒王官周網雖云弛
一匡賴齊桓莫驚溝澮盈雨息當自乾

次韻和舒穆魯公春日感懷

下澤橫潦集幽林光景遲羈禽有哀響槁葉無丰姿梁
梯不同畝世事久當遺便欲駕扁舟泛彼湖上漪慨懷
祈招賦愴惻感遐思流光逐飄風去若六馬馳干戈尚
雜還舉目多可悲步登西城憐還望東城陴近悼春陵

吟遠傷鴻雁詩未能已怨怒矧暇防咲嗤賴有賢大夫
直道人不欺相期各努力共濟艱難時

紫虛周道士還俗多年而貧老如故元帥舒穆魯
公憐其無依復令歸觀就養

白鶴棲青松願與人世違松高風露寒却向人間飛江
湖無稻梁歲莫將疇依稀首浮丘公涕淚灑毛衣浮丘
憐老鶴解悟既往非浴以丹池泉照以若木暉脩然骨
髓清還向青松歸松葉烟茸茸松華霧菲菲可棲復可

食其樂天下稀如何從鴈鷺喋呷圖身肥

偶興

勞人怨長途壯士悲老別那將望鄉心對此傷神月淒涼寒風至惆悵芳草歇瑤琴無子期絲弦爲君絕

雜感

畸窮傷往事晚莫悔前非流光不相待逝川那可追佳期隔河漢日夕千里思鴻鴈西北來安能從之飛佇立望明月天霜夜沾衣

黃慎之自閩見訪夜坐對酌悵然有感

故人一爲別七見秋夕月今日見故人故人鬚髮新世
情如鬚髮故人當識察車輪東北馳車轂終不移

倦暑伏管蒯白汗如流瀉開門見故人謂是天上下新
人各自媚故人何爲者斧斤入山林松栢化灰炮寄語
風胡子莫恠金躍冶

煌煌華燭輝扇扇飛蛾翼羲和倚扶桑恨無夸父力大
鵬雖有能萬里亦一息可憐千斤牛坐受鼯鼠食

故人髮猶黑故人心尚赤人生一世間幾見駒過隙南
山有喬松翠鷓鬪顏色般倭不收錄野火恣焚炙枝枯
榦亦折雪霰交洒浙中心有流液入地化爲石遺之五
百年猶堪補青天

鄭同夫餞別圖詩

江上潮始白林端霞半紫微風颺歸帆紅葉映行子芳
醪恥金樽清歌猶在耳馬鳴不見人愁來若流水

誠意伯文集卷三

謹案第三頁後二行布延舊作普顏今改正 三

十頁後八行托音舊作脫因今改正後倣此

四十八頁後三行舒穆魯舊作石末今改正後

倣此





總校官候補中書臣吳紹濂
校對官中書臣張培

謄錄監生臣張虎文